

Ilinalathala ng Partido Komunista ng Pilipinas-Bagong Hukbong Bayan sa Rehiyong Bikol

REBOLUSYONARYONG
PANGMASANG
PAHAYAGAN
NG BIKOL

Taon XXIX Blg.1
Mayo 10, 2005

Protesta Laban kay Gloria: Lumalawak, Dumadalas

Abril 18, nang paralisahin ng mga drayber ng bus, dyip at traysikel ang pampublikong byahe sa buong bansa. Sa Bikol, isandaang porsyentong tumigil ang pagpapasada sa mga prubinsya ng Camarines Norte at Sorsogon. Walumpung porsyento naman ng mga drayber sa Albay at Camarines Sur ang lumahok sa tigil-pasada. Sa Masbate, ang mga drayber ng walong ruta ng bus at 100 na traysikel ay lumahok sa protesta. Nagkaroon din sa prubinsyang ito ng karaban at *noise barrage*. Sa kabuuan, 91 na porsyento ng pampublikong transportasyon ang naparalisa sa Bikol.

Mariin ang mensahe ng ginanap na pagkilos: Kinukundena ang patuloy na pagtaas ng presyo ng langis, ang kainutilan ng rehimeng US-GMA, at ang sumasahol na busabos na kalagayan ng mamamayan.

Kasabay ng pagkilos na ito ang pagbisita ni GMA sa Palarong Bikol sa Pili, Camarines Sur, nitong Abril. Kahit hinarangan ng mga pulis, desididong lumusot ang mga

magpuprotesta sa pinagdausan ng Palaro, kung saan magbibigay ng mensahe si Macapagal-Arroyo. Pagsimula pa lamang ni GMA, linadlad ng mga militanteng grupo ang isang *balatenga* na sumisigaw ng pagtuligsa sa panunungkulan niya. Picon na tinapos ni GMA ang kanyang talumpati sa loob lamang ng tatlungumpung segundo.



sundan sa pahina 2

Protesta Laban kay Gloria: Lumalawak, Dumadalas	p. 1
Editoryal: Rebolusyonaryong Pwersa sa Kabikolan, Umaani ng mga Tagumpay	p. 4
Dayuhang Pagmimina sa Kabikolan, Hahadlangan ng Rebolusyonaryong Kilusan	p. 5
Pangil ng Pasistang Estado: Nananalasa sa Mamamayang Bikolano	p. 6
Nakasampa sa JMC: Mga kaso ng Pamamaslang Laban sa 9th ID PA	p. 8
Rebolusyong Agraryo, Sumusulong	p. 9
Taktikal na Opensiba	p. 11
"Buhay namin ito" Rebyu ng Pelikulang Buhay Masbatenyo	p. 13
Mga Pagkilos ng Magsasakang Bikolano, Matagumpay	p. 15
Protestang Bayan ang Magpapataksik sa Rehimen	p. 16
Rebolusyonaryong Tula	p. 17
Rebolusyonaryong Kanta Batoy	p. 18

ABANGAN
ang paglalabas ng
TANGHAL

2004 isyu ng
PUNLA

Protesta Laban kay Gloria

Mitsa ng protesta

Kung noong Abril 2004, ay P17.40 hanggang P18.35 lamang ang presyo ng bawat litro ng *diesel*, ngayon ay P27.69 na. Halos sampung piso ang idinagdag. Kasabay nitong tumaas ang presyo ng iba pang produktong petrolyo. Nagkaroon ng pitong beses na pagtaas mula Pebrero hanggang Abril.

At dahil sa estratehikong importansya ng langis sa bawat industriya ng ekonomya at sa pang-araw-araw na buhay ng masang Pilipino, nararamdaman hanggang sikmura ang pagtaas ng presyo nito. Tumaas ang presyo ng gulay, karne at iba pang pagkain dahil sa mas mahal na ang transportasyon ng mga ito. Ang bigas ay tumaas ng P2 bawat kilo.


Nakasaad daw sa batas, kung kaya't hindi pupwedeng pigilan ni Gloria Macapagal-Arroyo ang pagtaas ng presyo ng langis. Ang oil deregulation law, isa sa pinaka-kontramamamayan at maka-imperyalistang batas ng reaksyunaryong gubyrerno, ang nagpapahintulot nito. Ang batas na ito ay idiniktang patakaran ng imperyalismong US, upang mas maging maluwag ang pandarambong ng mga dayuhang korporasyon ng langis, sa ekonomya ng Pilipinas.

Tuluy-tuloy ang pagtaas ng presyo ng krudong langis sa pandaigdigang pamilihan. Sanhi ito ng pananalakay ng imperyalistang US sa bansang Iraq, na isa sa mga mayor na nagsusuplay ng krudong langis sa mundo. Kung kaya, nalulugi raw and dambuhalang kartel sa langis na kinabibilangan ng Shell, Petron at Caltex. Kailangan daw nilang sunud-sunod na magtaas ng presyo upang makabawi. Ngunit, ayon sa pag-aaral, P6.2 bilyon ang kinita ng kartel sa langis dahil sa kanilang *overcharging*, o labis na pagpepresyo. Maliban pa ito sa kinamal nilang orihinal na target na tubo. Malinaw na sinasamantala ng kartel sa langis ang pagkakataong magbenta ng kanilang produkto sa di-makatarungang presyo.

Upang ikubli ang katotohanang sunud-sunuran lamang siya sa dikta ng imperyalismong US, nagpanukala si GMA na repasuhing muli ang oil deregulation law upang maamyendahan.

Ang pagtanggap ibasura ang batas na ito, at sa kabilang banda ang pagkukumahog na maisabatas ang bagong iskema ng value-added tax (VAT) ay naglalantad sa pagiging salot sa mamamayan ng rehimen US-GMA. Ibibilang na sa papatawan ng VAT ang mga produktong petrolyo at mga produktong agrikultural. Kasabay na rin sa papatawan ng VAT ang mga *independent power producer*, o mga pribadong kumpanyang nagsusuplay ng kuryente.

sundan sa pahina 3



Protesta Laban kay Gloria

Malupit ang bweltada nito sa maliliit na mamimili sapagka't sa kanila rin ipapasa ang dagdag na buwis. Tataas pa ng P2.65 ang presyo ng bawat litro ng petrolyo dahil sa VAT. Sa huling bahagi ng taong ito, maaaring umabot sa P40-P50 ang litro ng gasolina.

Habang patuloy na umaarangkada pataas ang mga presyo ng bilihin, bumubulusok naman pababa ang kinikita ng masang anakpawis. Hanggang ngayon, hindi pa rin ibinibigay ang kahilingan para sa dagdag na P125 sa arawang sahod ng mga manggagawa, at P3,000 na dagdag sa sweldo ng mga kawani ng guberno. At dahil sa halos hindi na makayanang presyo ng langis, umaabot na lamang sa P20 ang inuuwing kita bawat araw ng mga drayber ng dyip.

Rali, istrayk, welga: sumasambulat na galit ng masa


Sa harap ng bumubulwak na mga pagkilos ng masa, walang ibang patutunguhan ito kundi ang pagpapataksik sa rehimeng US-GMA. Naniningil na ang taumbayan. Mabilis at napakadali para sa kanila ang tuntunin ang mga kalsada at lumahok sa mga kilos-protesta. Marami nang aral ang nahalaw ng masa mula sa pagpapataksik sa iba pang papet na presidente ng bansa. Hindi nila kailangang pagtiisan ang pamumuno ng isang mapaniil at tuta-ng-imperyalis-mong pangulo.

At habang dumadaluyong ang mobilisasyon ng masa, mas lalong tumataas ang militansya ng kanilang pakikibaka. Hindi lalaon, mas maraming mamamayan ang hahawak ng armas at lalahok sa digmang bayan, upang tuldukan ang umiiral at lugmok sa krisis na sistemang malapyudal at malakolonyal.



ABRIL 2, 2005 ▼

26.60



23.08

16.80

▲ ENERO 3, 2004

PRESYO NG KRUDO

Rebolusyonaryong Pwersa sa Kabikolan, Umani ng mga Tagumpay

Umani ng mga tagumpay ang pagsusulong ng lahatang-panig na mga gawain sa rehiyon.

Nalampasan na nito ang rurok ng lakas na inabot noong kalagitnaan ng taong 1987 sa usapin ng pagbubuo ng Partido, BHB at NDF. Malapit nang abutin ang dating lawak at lakas ng baseng masa.

Umabot sa ilampung libo ang bilang ng kasapiang ng mga saligang organisasyong masa sa kanayunan sa nakaraang tatlong taon. Daan-daan ang naitayong mga komiteng pang-organisa sa baryo. Umabot na sa halos isandaan ang mga ganap na samahang masa ng magsasaka, kababaihan at kabataan at naitayo na ang ilang KRB.

Sa kalunsuran, solidong nakapag-organisa sa hanay ng masang manggagawa, magsasaka, maralitang komunidad at panggitnang pwersa. Inabot ang halos 200 porsyentong paglaki ng mga grupong pang-organisa sa mga komunidad, eskwelahan at pabrika.

Isang sukatan ng tagumpay ang paglawak at paglakas ng saligang alyansa ng manggagawa-magsasaka sa kanayunan. Ang Partido ay mahigpit na nakaugat sa hanay ng masang magsasaka sa kanayunan sa pamamagitan ng nakatayong mga Sangay ng Partido. Lumaki ang kasapiang ng Partido maging sa hanay ng mga manggagawa sa kalunsuran. Dagdag pa dito ang mga irerekluta sa Partido na ilampung libong aktibistang masa, na masigasig na gumagampan ng mga rebolusyonaryong gawain sa kanilang mga lugar na kinikilusan. Patuloy na lumalaki ang mga mobilisasyong masa.

Sumulong ang armadong pakikibaka sa kanayunan. Lumakas at nadagdagan ang



bilang ng mga platon ng Bagong Hukbong Bayan. Taun-taon, nakapaglunsad ang BHB sa Bikol ng mahigit sa 70 maliliit at malalaking taktikal na opensiba. Mahigit sa 100 malalakas na armas ang nadadagdag bawat taon. Lakas kumpanya ang naging pinsala sa AFP-PNP-CAFGU at hindi pa kabilang dito ang pinarusahang masasamang elemento.

Sa nakaraang tatlong taon, umabot sa ilang kumpanya ang boluntaryong sumasapi sa BHB taun-taon. Bunga ito ng mga tagumpay sa pagpapalawak at pagpapalalim ng organisadong baseng masa na siyang balon ng mga kadre at mandirigma ng BHB. Lumaki ng 35 porsyento ang kasapiang ng mga organisasyong masa sa nakaraang tatlong taon.

Sa balangkas ng anti-pyudal na nagkakaisang prente, isinakatuparan ng rebolusyonaryong kilusan ang minimum na programa sa reporma sa lupa at mga kampanyang masa upang paunlarin ang antas ng pamumuhay ng mga magsasaka.

sundan sa pahina 5

Dayuhang Pagmimina sa Kabikolan, Hahadlangan ng Rebolusyonaryong Kilusan

"Hahadlangan ng rebolusyonaryong kilusan at ng mamamayan ang lahat ng proyekto ng dayuhang pagmimina sa rehiyon at parurusahan ng NPA ang mga dayuhang kumpanya kabilang ang mga kasabwat nilang malalaking kumprador. Ito ay malinaw na panibagong panda-rambong ng dayuhan at napatunayan nang sumisira sa kalikasan at pumipinsala sa kabuhayan, kalusugan at ari-arian ng mamamayan," pahayag ni Ka Greg Bañares, ang tagapagsalita ng NDF-Bikol.

Mariing kinundena ng NDF ang pataksil na pagbaligtad ng Korte Suprema sa nauna

nitong desisyon na nagdeklarang labag sa reaksyunaryong Konstitusyon ang Mining Act of 1995. Ito ay lantarang pagbebenta ng pambansang patrimonya at pagpa-paubaya ng natitirang likas-yaman ng bansa sa mga dayuhang kumpanya sa pagmimina.

Ayon kay Ka Greg, manipestasyon ito ng walang taros na pangangayupapa ng rehimeng Macapagal-Arroyo sa mapan-dambong na imperyalistang patakaran ng globalisasyon ng "malayang pamilihan".

Sa ilalim ng Mining Act of 1995, pina-payagan ng rehimen ang mga kumpanyang 100 porsyentong pag-aari ng dayuhan na putulin ang mga punongkahoy at ubusin

ang mga kagubatan, patagin ang mga kabundukan, at hukayin ang mga likas-yaman sa kailailaliman ng lupa gamit ang modernong mga kagamitan.

Binibigyang laya ng *Batas sa Pagmimina* na angkinin ng mga dayuhang kumpanya ang natitirang likas-yaman ng bansa kabilang ang pinag-kukunan ng tubig ng mga komunidad sa saklaw na lugar ng pagmimina.

sundan sa pahina 6



EDITORIAL

Inabot na ng kampanya sa pagpapababa ng upa sa lupa ang mahigit sa 38,000 ektaryang niyugan, palayan at taniman. Mahigit sa 10,000 pamilya sa kanayunan ang nabibiyayaan ng rebolusyong agraryo sa Bikol.

Puspusan ang masikhay na paggawa ng mga rebolusyonaryong pwersa upang abutin

ang mas mataas na antas ng konsolidasyon sa larangan ng ideolohiya, pulitika at organisasyon.

Sa susunod na mga taon, tiyak na kakamtin ang higit pang mga tagumpay sa lahatang panig na pagsusulong ng rebolusyonaryong mga gawain sa rehiyon.

S

Pangil ng Pasistang Estado: Nananalasa sa Mamamayang Bikolano

Sunud-sunod ang nagaganap na pamamaslang at marahas na pang-aatake sa mga lider at myembro ng progresibo at demokratikong mga organisasyon sa buong bansa. Mula Enero hanggang Marso 15, umabot na sa 32 ang pinaslang at may pito pang nawawalang mga aktibista. Ang katindihang ito ay umaabot na sa pangkaraniwang kaganapan bawat linggo. Hindi pa kabilang dito ang lima pang mamamahayag na pinatay mula sa pagpasok ng taon hanggang nitong Mayo.

Sa Sentral Luzon na siyang sentro ng

pakikibaka ng mga magsasaka sa Hacienda Luisita, 13 ang pinaslang at may lima pang dinukot na nawawala pa hanggang sa ngayon.

Sa Bikol, umaabot na sa 64 ang kaso ng pamamaslang ng mga pasistang elemento ng AFP-PNP-CAFGU sa mga magsasaka, myembro at lider ng mga progresibong organisasyon, grupong relihiyoso at masmidya sa ilalim ng panunungkulan ni Macapagal-Arroyo.



sundan sa pahina 7

Dayuhang Pagmimina

Taliwas ito sa likas na karapatan ang mamamayang Pilipino na gamitin at pakinabangan ang pambansang patrimonya upang mapaunlad ang isang nagsasariling ekonomya na industriyalisado at maunlad.

Ngunit sa ilalim ng liberalisasyon ng industriya ng pagmimina, walang tunay na kaunlaran na ihahatid ang dayuhang pagmimina dahil nakatuon ito sa pag-eksport ng hilaw na materyales at hindi nakabalangkas sa pagpapaunlad ng sariling mga batayang industriya at sa pambansang industriyalisasyon, paliwanag pa ni Ka Greg.

Aniya, anumang kakarampot na pakinabang na ihahatid sa mamamayan ng dayuhang pagmimina, tulad ng ilang trabaho at imprastruktura, ay mapapawalang-saysay dahil sa pangmatagalang masamang epekto nito sa kalikasan at kabuhayan ng mamamayang Pilipino.

Sa nakaraan, hindi na mabilang ang mga naging biktima ng mapangwasak na mga baha, pagguho ng lupa, tagtuyot at pagkalason ng mga ilog at lupang sakahan ng mga magsasaka. Masamang epekto sa kalusugan, dislokasyon sa mamamayan at

kawalang-hanapbuhay ang idinulot ng mahigit isandaang taong pandarambong ng mga dayuhang kumpanya sa pagmimina, pagtotroso, at iba pang mapaminsalang proyekto.

Mahigpit na ipinatutupad sa saklaw na teritoryo ng Demokratikong Gubernong Bayan, katulong ang mga rebolusyonaryong organi-sasyong masa ang mga patakarang laban sa dayu-hang pagmimina. Ipinagbabawal ang komersyal na pagtotroso para sa eksport, malawakang pagputol ng mga kahoy at pagkalbo sa kagubatan. Ipinagbabawal din ang pag-lason sa mga ilog at dagat, at ang iba pang proyektong mapangwasak sa kalikasan.

Ayon pa kay Ka Greg, *"laging nakahanda ang NPA sa Bikol na ipagtanggol ang kalikasan at natitirang likas-yaman ng bansa, ipaglaban ang malawakang pagpapalayas sa magsasaka at iba pang mamamayan sa kanilang tirahan at parusahan ang mga kumpanyang dayuhan at lokal na mapapatunayang lumalabag sa patakarang ito."*

S

Pangil ng Pasistang Estado

Nitong Marso hanggang kala-gitnaan ng Abril, lima ang pinaslang na lider, organisador at myembro ng mga progresibong organi-sasyon ng mga magsasaka at party list sa rehiyon.

Marso 10 – Alas dyes ng gabi nang pagbabarilin ng apat na elemento ng Military Intelligence Group (MIG) ang 50 taong gulang na lider magsasaka na si Ernesto Bang sa harap ng kanilang bahay sa Brgy Malangkaw-Basud sa bayan ng Labo, Camarines Norte. Si Ernesto Bang ang tagapagsalita ng Kilusang Magbubukid ng Pilipinas-Camarines Norte Chapter. Si Bang ay isa sa mga nadaplisan ng bala nang pagbabarilin ng isang myembro ng MIG ang mga nagrarali sa Daet noong Disyembre 10.

Isang oras bago naganap ang pamamaslang, nauna nang hinaras ang dating tagapangulo ng KMP-Camarines Norte na si Eduardo Avila. Tinangkang pasukin ng dalawang armadong lalaki ang bahay nito na malapit lamang sa bahay ni Bang.

Marso 12 – Binaril ng militar ang 64 taong gulang na magsasakang si Jose Gueriba sa Brgy San Jose “Paroros” sa bayan ng Donsol, Sorsogon. Ang nag-operasyong mga elemento ng Philippine Army ay mula sa detachment ng Alpha Coy ng 2nd IB sa Brgy Abucay sa bayan ng Pilar at sa 901st IBde na nakabase sa Villahermosa sa bayan ng Daraga, Albay.

Si Gueriba ay aktibong myembro ng Sorsogon People’s Organization. Siya ay pinaratangan ng mga militar na NPA.


Marso 16 — Tanghaling tapat nang barilin ang isa pang myembro at organisador ng progresibong partylist na Anakpawis sa Brgy Calero sa bayan ng Jose Panganiban, Camarines Norte. Iniwanan pa ng pulang laso ang bangkay ng 33 taong gulang na traysikel drayber na si Joel Reyes. Apat na armadong kalalakihang pinaghihinalaang mga elemento ng MIG ang may kagagawan ng nabanggit na pamamaslang.

Abril 25 — Pinaslang ang dating Tagapangulo ng Bicol Coconut Planters Association, Inc. (BCPAI) na si Delio Apolinar sa bayan ng Pamplona, Camarines Sur. Si Apolinar ay isang maliit na magniniyog na aktibong namuno sa mga kampanyang nagsusulong ng kahilingang kagyat na maibalik ang pondong coco levy sa maliliit na magniniyog. Aktibo siyang lumahok sa paglaban ng mga

magniniyog na Bikolano sa resikada. Ilang araw bago siya pinaslang, nakita ang ilang ahente ng militar na nagmamanman sa paligid ng kanilang tahanan.

Isa pang myembro ng progresibong partylist na Bayan Muna ang pinaslang sa Camarines Norte.

Daan-daan naman ang biktima ng ilegal na pang-aaresto at pagkulong, harasment, pagpapalikas, pang-hahalughog at pekeng pagpapa-“surrender” sa mga sibilyan. Ang kampanyang Re-engineered Special Operation Team-SOT ng militar ay patuloy na naghahasik ng terorismo sa kanayunan ng rehiyon. Sa tuwina ay ligalig ang magsasaka sa pagpasok ng militar sa mga baranggay at hindi sila makapagsaka sa takot na mabugbog at mapaslang.



sundan sa pahina 8

Nakasampa sa JMC: Mga Kaso ng Pamamaslang Laban sa 9th ID Philippine Army

Dumaraming mga kaso ng paglabag sa Kumprehensibong Kasunduan sa Paggalang sa Karapatang Pantao ang isinasampa sa Secretariat ng Joint Monitoring Committee (JMC) ng National Democratic Front of the Philippines. Ilan lamang dito ang sumusunod na kaso:

Setyembre 8, 2004, bandang alas otso ng gabi —Pinagbabaril ng isang lasing na CAFGU na si Glen Arcega ang limang taong gulang na batang si Honeybel Morada sa tapat ng kanilang tahanan sa Macalaya, Castilla, Sorsogon. Agad na namatay ang bata sa mga tama ng baril. Ang CAFGU na si Arcega ay nakadestino sa Philippine Army/ CAFGU detachment sa Brgy Macalaya na nasa ilalim ng pamumuno ni Sgt Alibin ng 2nd IB ng 901st Bde ng 9th ID.

Pebrero 9, 2003, alas otso kwarenta ng gabi—Pinasok ng mga elemento ng CAFGU ang bahay ng pamilya ng magsasakang si Henry Vargas Madrid. Pinagbabaril ng isang CAFGU ang natutulog nang si Henry Madrid

habang katabi nito ang kanyang 10 buwang sangol na anak.

Enero 4, 2003, alas syete ng gabi—Pinaulanan ng bala ang tahanan ng isang Baranggay Tanod at mangga-gawang bukid na si Romulo Ballon Santiago. Duguan at walang buhay na bumagsak ang biktima sa tabi ng kanyang asawa. Tinamaan ito ng mga bala sa ulo at iba pang parte ng katawan. Isang buwan pa bago nangyari ang pamamaslang, pinaikutan ang kanilang bahay ng mga elemento ng 2nd IB ng PA at CAFGU na nakabase sa Brgy Aniog sa bayan ng Juban, Sorsogon. Ang biktima ay inakusahan ng mga militar na nagpapasok sa kanilang bahay ng mga NPA.

Agosto 25, 2002—Natagpuan ang bangkay ng biktima si Juan Aguilar Jr sa compound ng La Union Elementary School sa bayan ng Castilla, Sorsogon.

sundan sa pahina 9

Pangil ng Pasistang Estado

Sapilitan silang pinatitipon upang makipagkaisa sa mga proyekto ng militar sa baryo. Tumatagal mula tatlo hanggang anim na buwan ang mga SOT na ito sa isang lugar.

Lalong pinati-tinding reaksiyong naryong estado ang pang-iintriga at pagbabansag na “terorista” ang mga progresibo at demokratikong grupong tunay na nagtataguyod sa mga interes ng mamamayan upang bigyang matwid ang lantarang pasistang pang-aatake sa kanila sa ngalan ng “gera laban sa terorismo”.

Ito ay sistematikong panunupil sa lahat ng grupo at indibidwal na nagpapahayag ng pagtutol sa bulok, papet at pasistang rehimeng Macapagal-Arroyo.

Dagdag pa dito ang pagmamadali ng pasistang rehimen na isabatas ang Anti-Terrorism Bill at iimplementa ang National ID System na lalong yuyurak sa mga karapatang pantao at kalayaang sibil ng mamamayan.


Ang walang kasintinding kahirapan bunga ng krisis ng naghaharing sistema sa ilalim ng papet na rehimeng Arroyo ay tinatapatan ng papalupit na lantarang pasismo upang sawatain ang pagtatanggol at paglaban ng mamamayan para sa kanilang karapatan at kagalingan. Hindi magtatagal ay huhubarin na ng rehimen ang burgis demokratikong pagkukunwari upang lantarang iwasiwas ang kamay na bakal ng pasistang diktadurang paghahari.

S

Rebolusyong Agraryo, Sumusulong

Mahigpit na tinatangkilik at itinataguyod ng masang magsasaka sa buong rehiyon ang rebolusyonaryong kilusan. Ito'y dahil batid ng masang magsasaka sa Bikol na nasa rebolusyonaryong kilusan ang kalutasan ng kanilang malalim na problema sa kabuhayan, na nakaugat sa problema sa lupa. Nakatitiyak silang malulubos lamang ang pagtugon sa kanilang mga pang-ekonomyang kagalingan sa piling ng kanilang hukbo at mga kasama.

Pangunahing nilalaman ng Demokratikong Rebolusyong Bayan ang pagkakamit ng layunin ng mga



magsasaka na makuha ang pinakamalaking pakinabang sa lupang binungkal at ang pagpawi sa iba't ibang anyo ng pagsasamantalang pyudal at malapyudal. Ang layuning ito ang nagbubunsod sa masang magsasaka na masiglang isulong ang rebolusyong agraryo. Katuwang ang Hukbo, ilinalatag ng mga solidong organisasyong masa ang programa para sa minimum na layuning ibaba nang husto ang upa sa lupa at pawiin ang usura.

Tinatanaw din ng mga magsasaka ang pagsa-sabansa ng mga lupain para sa sosyalistang produksyon.

sundan sa pahina 10

Nakasampa sa JMC

Bago pa nangyari ang pagsalbeyds, nakaranas na ng pananakot ang pamilya ni Aguilar mula sa mga elemento ng CAFGU at Philippine Army na nakabase sa detachment ng Monte Carmelo. Nagtangka ang mga ito na pasukin ang kanilang bahay at walang pakundangang nagpa-putok ng baril malapit sa kanilang bahay noong Marso 2002. Napilitan noong maggiya si Aguilar sa operasyong militar dahil sa takot. Patuloy itong nakaranas ng harasment mula sa mga militar nang tumanggi itong sumapi sa CAFGU.

Mayo 7, 2002 —Tinortyur at pinaslang ang dalawang nahuling NPA na sina Romulo Embile Espedillon at Ryan Espallado Bermillo sa Brgy Sta Ana sa bayan ng Gubat, Sorsogon. Hinilada papunta sa kalsada at dinala sa munisipyo ang bangkay ng dalawa at ipinagyabang ng mga elemento ng Bravo

Coy ng 2nd IB na pinamunuan ni 2Lt Glen Quilantang na namatay ang mga ito sa isang engkwentro.

Sina Espedillon at Bermillo ay mga bihag ng digma na dapat sana'y ginawaran ng nararapat na makataong pagtrato batay sa sibilisado at internasyunal na mga batas ng digmaan.

Pebrero 23, 2002, alas dyes ng gabi—Nakita ng kanyang mga anak nang kaladkarin palabas ng kanilang bahay ang 41 taong gulang na magsasakang si Luis Lacsang ng mga elemento ng 2nd IB PA na pinamunuan ni Col Romeo Cabatic sa sityo Gabod, Brgy Taromata sa bayan ng Bulan, Sorsogon. Kinaumagahan, natagpuan ang bangkay nito, 100 metro ang layo mula sa kanilang bahay. May anim na tama ng bala, may mga pasa ang katawan at basag ang ngipin at panga ng biktima.

S

Rebolusyong Agraryo

Sa pagsusulong ng kumprehensibong programa sa reporma sa lupa, ginagarantiyahan ang kabuhayan ng mga magsasaka sapagkat ipagkakaloob sa kanila ang karapatang magbungkal ng mga lupain.

Martsa ng Magsasaka

Kaalinsabay ng pag-usbong ng rebolusyonaryong kilusan sa buong rehiyon ang masidhing pagkilos ng masang magsasaka. Mula sa mga niyugan, palayan, maisan, pastuhan, tubuhan, at iba pang taniman, dinagsa ng mga magsasaka ang kuta ng mga panginoong maylupa, ang bodega ng mga kumprador, at balwarte ng mga burukrata. Taliwas sa nagsasariling katangian ng kanilang pagsaka, hinarap ng pulu-pulutong na mga magsasaka ang kanilang mga katunggaling uri bilang iisang pwersa, at sila'y nagkamit ng mga tagumpay.

Ilinuwal ng mga determinadong kilusang masa ang matatagumpay na pagpapababa ng upa sa lupa. Sa mga lupaing sinaklaw ng pagpapababa ng upa, partikular sa mga niyugan, labis na pinahahalagahan ng mga magsasaka ang pagkakamit ng tersyong baliktad sa karamihan ng mga sinaklaw ng kanilang pakikibaka. Pumapanig na rin sa kanila ang mga hatiang 60-40 at 75-25 na dati'y pabor sa mga panginoong maylupa.

Nakamit din ang partihang 50-50 sa mga lupaing pagmamay-ari ng ilang maliliit na panginoong maylupa at mga mayamang magsasaka. Sa mga lupaing ito, malaking bentahe sa mga magsasaka na ang may-ari ng lupa ang gumagastos sa paghakot at transportasyon ng kopra.

Nadagdag din sa mga ikinampanya ng mga organisasyong masa ang mga suyuan at luyu-luyo sa sakahan. Naitayo na rin ang

mga kooperatibang tindahan, kooperatiba sa mga kagamitan sa pagsasaka at patubig, at pag-aalaga ng mga hayop. Mahalaga ang mga kampanyang ito upang unting-unting maigpawan ang mga batayang kalagayan kung bakit napipilitang mangutang ng mga magsasaka, upang sa malaon, mapawi ang pagkatali ng masang magsasaka sa usura. Pinagsusumikapan din ang paglulunsad ng mga kampanya sa pagpapaunlad ng pamamaraan sa pagtanim at pagpapaunlad ng produksyon sa kanayunan.

Tagumpay Matapos ang mga Sakripisyo


Dahil sa wastong mga pamamaraan at linya, umani ng pulumpon ng mga tagumpay ang magsasakang Bikolano.

Subalit katumbas ng puspusang pakikibaka at pagpursige sa wastong programa ang pagsungab sa mga tagumpay na ito.

Kaakibat ng bawat pagkilos ng mga magsasaka ang matamang pag-aaral sa kinakaharap na laban, mahigpit nilang pagkakaisa, at ang buong-loob na pagmobilisa sa kanilang hanay. Sapagkat bawat paggiit nila'y kawalan para sa mga panginoong maylupa at komprador, batid ng mga magsasakang sa pagpupunyagi makakamit ang mga tagumpay. Iba't ibang anyo ng pagkilos ang itinatapat ng mga magsasaka para sa iba't ibang tipo ng katunggali. Nakahanda ang kilusang masa ng magsasaka na isulong ang kanilang interes sa pamamagitan man ng mga mapayapang negosasyon at rali, o maging sa mga gitgitang kumprontasyon at tahasang pandarahas.

Sadyang napakaliit na pwersa lamang ang iilang panginoong maylupa at kumprador kung kaharap ng laksang magsasakang walang takot at matatag na naninindigan.


sundan sa pahina 11





Taktikal na Opensiba

Buong giting na ilinulunsad ng Bagong Hukbong Bayan sa Bikol ang malaganap na mga taktikal na opensiba sa buong rehiyon. Bagamat maliliit, pinangangatog ng matutunog na taktikal na opensiba ang tuhod ng mga kaaway ng mamamayan. Sa maagang bahagi pa lamang ng taong 2005, agad na nakapag-ambag ang rebolusyonaryong kilusan sa Bikol sa pambansang panawagang paigtingin ang mga taktikal na opensiba.



Pumutok sa rehiyon ang ilang matutunog na atake ng Hukbo na nagbigay ng maririing dagok sa mga pasista ng 9th Delubyo Division, mga kontra-mamamayan sa PNP, at sa mga pinaka-reaksyunaryo sa rehimen ni Gloria Macapagal-Arroyo.

sundan sa pahina 12

Rebolusyong Agraryo

Sa ilang dekadang puspusang pagsusulong ng rebolusyonaryong programa sa lupa, mahigit 300 panginoong maylupa ang hinarap ng pakikibaka ng mga magsasaka at aabot sa 40 libong ektarya ang lupaing sinaklaw ng kanilang pagkilos. Nagdudulot ito ng malaking kapakinabangan para sa mahigit sampung libong pamilyang magsasaka.

Mapagpasya sa mga tagumpay na ito ang papel ng Hukbo at ang pamamatnubay ng Partido. Higit sa lahat, ang lakas ng loob ng masang magsasaka at ang pananaig sa mga panginoong maylupa't kumprador ay hinuhugot sa pagsandig ng masa sa rebolusyonaryong kilusan.

Marapat lamang na isulong sa mas maunlad na antas ang pakikibaka ng masang magsasaka. May sapat nang konsolidasyon at laking inabot ang mga organisasyon ng mga magsasaka, gayundin ang lawak ng latag at lakas ng mga yunit ng hukbo.

Makabuluhang mga tagumpay ang nakamit ng magsasakang Bikolano katuwang ang kanilang hukbo at mga kasama sa rebolusyonaryong kilusan. Ang nalikom na mga tagumpay na ito ay may malaking kapakinabangan sa buong mamamayang nagsusulong ng digma. Ihinahanda nito ang masang magsasaka sa papalaki at papaigting na mga laban sa pamamagitan ng pananagumpay ng maliliit at hiwa-hiwalay na pakikibaka. Mahalagang patuloy na panghawakan ng mga organisasyon ng magsasaka ang kanilang mga tagumpay. Kaakibat ng pagseseguro sa kanilang mga inani ang ibayong pagkonsolida sa kanilang hanay, patuloy na pagpapaunlad ng mga programang pang-ekonomya, at patuloy na pag-ambag sa kanilang rebolusyonaryong kilusan, sa pamamagitan man ng mga rekursong ambag, kontribusyon, at lakas-tauhan, na pawang makabuluhan sa pagpapatuloy ng digmang bayan.

S

Taktikal na Opensiba

Mula Pebrero hanggang Abril, napatay ang hindi bababa sa 21 kaaway ng mamamayan mula sa hanay ng AFP, PNP, CAGU, at mga masasamang elementong nagsisilbing masusugid na giya at espiya ng kaaway. Labing isa din ang nasugatan sa kanila. Nagluwal ang mga operasyong ito ng ilang mataas na kalibreng riple at maliksing baril, na mag-aarmas sa dumaraming bilang ng mga nagpupultaym sa BHB.



Marso 2, sa Mobo, Masbate. Sinalubong ng isnayp ang bagong pakat na 20th IB na nasa ilalim ng 8th Infantry Division na pinamumunuan ng berdugong si Gen Jovito Palparan. Dahil sa takot, bahag ang buntot na nagsipag-pull out ang mga sundalo na magsasagawa sana ng SOT sa eryl.

Pebrero 14, sa Virac, Catanduanes. Inisparo at napatay ng isang tim ng BHB ang dalawang elemento ng PNP na nagsasagawa ng tsekpoynt malapit sa airport. Isang armalayt at isang kalibre .45 ang nasamsam. Inambus din ang mga rumespondeng tropa ng PNP at napatay ang isa pang pulis at isang PNP intel, samantalang sugatan ang pito pa, kabilang na ang pasistang Provincial Commander na si Colonel Rosero.

Pebrero 16, sa Matnog, Sorsogon. Inisparo at napatay ang isang kasapi ng Police Provincial Mobile Group na masigasig na tagapagtayo ng lambat paniktik laban sa rebolusyonaryong kilusan. Nakasamsam ang BHB ng isang kalibre .45, magasin, at mga bala.

Pebrero 17, sa Cataingan, Masbate. Kinumpiskahan ng isang kalibre .45 ang dalawang goons ng pulitiko. Agad na nagreaksyon ang PNP, at nang papauwi na ang mga ito ay inisnayp ng isang tim ng BHB. Patay ang kumander ng yunit ng PNP. Masugid sa kontra-insurhensyang kampanya ang PNP sa isla.

Pebrero 24, sa Jose Panganiban, Camarines Norte. Napatay sa isang car-to-car ambus ang isang pinuno sa intel ng Military Intelligence Group na si Master Sergeant Dante Santos. Nakumpiska mula sa kanya ang isang kalibre .45 at mahahalagang datos sa intel.

Pebrero 24, sa Pasacao, Camarines Sur. Malubhang nasugatan si T/Sgt Hermie Millares nang ambusin ito ng mga kasama sa Brgy Caranan.

Marso 10, sa Ticao, Masbate. Hinaras ng mga pulang mandirigma ang detatsment ng PNP sa bayan ng San Jacinto. Isa ang patay at isa pa ang sugatan sa panig ng Regional Mobile Force. Ligtas namang nakaatras ang mga kasama.

Marso 19, sa Albay. Parehong inisnayp ng mga tim ng BHB ang mga nag-ooperasyong tropa ng 65th IB sa Brgy Bololo sa Guinobatan, at Brgy Busac sa Ligao City.

Abril 2, sa Castilla, Sorsogon. Inisparo at napatay ang upisyal sa intel ng 22nd IB na si S/ Sgt Manding Tanay. Isang kalibre .45 ang nakumpiska mula sa kanya.

Abril 3, sa Sipocot, Camarines Sur. Napatay sa isang operasyong isparo ang isang intel ng Philippine Army sa Brgy Tulatula.

Abril 3, sa San Vicente, Camarines Norte. Hinaras ng isang tim ng BHB ang detatsment sa Brgy San Jose.

Demoralisasyon din ang lumulukob sa mga pasistang sundalong nagpipilit na lumipol sa mga mandirigma ng BHB. Sa mga tangkang pag-atake ng mga militar, napanghahawakan ng mga kasama ang inisyatiba at naipipihit ang labanan tungo sa opensiba ng Hukbo.

Marso 12, sa Sorsogon. Napalaban ang isang tim ng BHB sa mga nag-ooperasyong Scout Ranger. Patay sa labanan si Cpl Avelino Bancuyo samantalang sugatan naman si Cpl Edwin Asco. Samantala, sa petsa ring ito, tinangkang kubkubin ng mga nag-ooperasyong tropa ng 22nd IB ang mga kasama sa Bulusan.

sundan sa pahina 13

"Buhay namin ito."

Rebyu ng Pelikulang Buhay Masbatenyo



Pagkagat ng dilim, ordinaryong tagpo sa kanayunan ang pag-iipon ng mga taumbaryo sa kanilang "sinehan." Karaniwang ekstensyon ito ng isang bahay na may maluwag na espasyo at mga upuan. Sa harapan ay ang tinututukan ng bawat tao – isang malaking telebisyon na nagpapalabas ng mga pelikulang naka-vcd. Kadalasan, sinisimot pa ng bawat manunood ang kanilang natitirang barya upang may pambayad lamang.

Mga kilalang artista ang makikitang bida. Hindi usapin kung malayo sa buhay ng masa ang kanilang papel na ginagampanan o kaya naman ay hindi kapani-paniwala ang mga eksenang pinapalabas, basta't maaksyon at madrama, tinatangkilik ng taumbaryo.

Hapon ng Hulyo 30, 2004, sa isang baryo sa Masbate, nagtipon ang mga tao. Ang ilan ay galing pa sa ibang lugar. Sentro rin ng kanilang atensyon ang malaking telebisyon sa kanilang harapan. Nananabik din

silang mapanood ang isang pelikula. Ngunit walang siningil sa kanilang bayad.

Parang pyesta ang tagpo. Andun ang mga batang malilikot na sa sobrang inip. Ang mga kabataan at matatanda naman ay bumabaling lagi ang usapan sa pelikulang ipapalabas. Hindi pa man napapanood, may antas na ng pamilyaridad sa pelikula, ang mga nagkukwentuhan.

Ito ang hapon ng unang pagpapalabas ng pelikulang **Buhay Masbatenyo**.

Kilusang masa ang pelikula ng masa

Sapagkat ang mga artista, taguyod, at sumuporta, ay galing din mismo sa hanay ng masa't kasama, walang kasing higpit ang pagyakap ng mga Masbatenyo sa nasabing pelikula.

sundan sa pahina 14

Taktikal na Opensiba

Sa nangyaring labanan, apat na militar ang napatay at wala ni isa mang kasama ang nagalusan.

Abril 5, sa Sipocot, Camarines Sur. Tinangka ring kubkubin ng mga sundalo ng 31st IB ang isang yunit ng Hukbo sa Brgy Sagrada. Ngunit dahil sa husay ng manera at suporta ng masa, napanghawakan ng mga kasama ang inisyatiba. Bagamat unang nakapagpaputok ang mga pasista, hindi tinamaan ang kasama na ilang dipa lamang ang layo. Apat ang napatay sa 31st IB, samantalang wala ni isa mang nalagas sa Hukbo sa malapitang labanan na naganap.

Sa mga susunod na buwan ng 2005, dadalas at dadami pa ang mga matutunog na taktikal na opensibang ilulunsad ng BHB sa Bikol. Ang mga ito ay magsisilbing kaparusahan sa



malulubhang kasalanan ng rehimeng Macapagal-Arroyo, at magpapalala sa hidwaan ng mga naghaharing uri. Pahihinain nito ang guberno ni Macapagal-Arroyo samantalang pinalalakas naman ang Bagong Hukbong Bayan.

Dagdag pa, magsisilbing inspirasyon ang mga taktikal na opensiba ng Hukbo upang mapataas ang militanteng diwa ng mamamayan at maglunsad ng mga pinaigting ding pakikibaka ng masa. Dahil batid ng mamamayang nakahanda ang kanilang Hukbo, lakas-loob silang maglulunsad ng mga protesta upang labanan ang paglala ng kanilang paghihikahos at paglubha ng pagsasamantala sa kanila. Igigiit nila ang pagpapabagsak sa kontra-mamamayan, maka-imperyalista, at pasistang rehimeng Macapagal-Arroyo.



Kalakhan ng mga gumanap ay lumahok sa isang pamprubinsyang treyning sa gawain sa rebolusyonaryong kultura. Kung kaya, hindi naging mahirap para sa mga pumapel ang paggagap sa wastong oryentasyon sa pagsusulong ng rebolusyonaryong kultura, bilang bahagi ng iba pang gawain sa pagsusulong ng digmang bayan. Hindi bababa sa laking kumpanya ang bilang ng mga masa't kasamang nag-ambag ng kakayanan upang maging matagumpay ang paglikha ng Buhay Masbatenyo.

Dahil na rin sa antas ng konsolidasyon ng masa sa erya, madulas ang kanilang pagsuporta sa paggawa ng pelikula. Naunawaan ng masa ang kahalagahan ng Buhay Masbatenyo sa larangan ng propaganda, upang higit pang bigkisin ang kanilang hanay sa pagsusulong ng armadong pakikibaka. At, upang ipaabot sa mga panginoong maylupa ang kanilang katatagan upang pawiin ang pagsasamantala at pang-aapi sa kanilang uri.

Ang buhay ng masang Masbatenyo

Mayor na salik ang wastong pagsusulong ng rebolusyong agraryo sa prubinsya kaya't naging matalas at tumpak ang nilalaman ng Buhay Masbatenyo, sa pagsasalarawan ng tunggalian sa pagitan ng uring malaking panginoong maylupa at uring magsasaka. Kongkretong ipinakita ng pelikula kung paano pinagsasamantalahan at dinadahas ng mga rantsero, na tumatayong malalaki at despotikong PML sa prubinsya, ang mayoryang magsasaka.

Simple lamang ang daloy ng pelikula. Lapat na lapat sa totoong karanasan ng masang magsasaka sa Masbate. Ipinakita sa simula ang masikhay na pagpapayaman ng masa sa kanilang maisan at palayan. Dumating ang PML na si Don Felino, na nagtangkang kamkamin ang kanilang lupa, upang gawing rantso. Ginamit ni Don Felino


ang kanyang armadong tauhan, at sinuhulan ang meyor ng bayan, upang mapalayas ang mga tao. Dumating sa puntong lumikas ang mga taumbaryo dahil sa pandarahas ng nasabing PML.

Sa bagong linipatan, pumasok naman ang isang PML na si Don Fausto, na nagnais ding mangamkam ng lupa. Ngunit sa bahaging ito, nasa eksena na ang Bagong Hukbong Bayan, na mahigpit na ipinagtanggol ang inaaping mga magsasaka. Ni-reyd ng Hukbo ang mga tauhan ni Don Fausto, hanggang napilitang umatras ang PML at nanyutralisa.

Ngunit ang despotikong si Don Felino ay ginamit pa ang mga bayarang militar upang itapat sa Hukbo. Isang matagumpay na ambusng mga kasama, ang ultimong nagpatimo kay Don Felino na hindi kailanman madadaig ang pagkakaisa ng Hukbo at masa.

Ipinakita rin ng pelikula ang unti-unting transpormasyon ng masa, mula sa walang kalaban-labang api, hanggang sa militanteng pagkilos nila at pagyakap sa armadong pakikibaka, upang ipagtanggol ang kanilang mga karapatan. Lahat ng ito ay bunga ng puspusang pag-oorganisa, pagpu-propaganda at pag-eeduka sa kanila ng mga kasama.

Pinatingkad ng makatotohanang pagganap ng mga artista ang sakit at pagdurusa ng masang magsasaka. Sa unang pagpapalabas ng pelikula, samu't saring emosyon ang mababakas sa manunood. Sa isang bahagi ng palabas, ang palahaw ng isang ginang na nakita ang pagpaslang sa kanyang asawa ng mga goons ng PML, ay nagpapatak sa mga nagngangalit na luha ng mga nanunood. Tahimik at tiim-bagang ang ilang tao habang sinasaksihan ang eksenang lumilikas ang mga taumbaryo, bitbit ang iilan nilang pag-aari, dahil sa pangangamkam ng PML sa kanilang lupa.



sundan sa pahina 15

Mga Pagkilos ng Magsasakang Bikolano, Matagumpay

Ipinagtagumpay ng pinagbuklod na pagkilos ng samahang *Kusog kan mga Paralukad sa Sorsogon (KUPRAS)* ang pagpapababa ng resikada sa kopras sa Sorsogon. Nakapaglunsad ng antas bayan at inter-bayang pagkilos upang mapababa ang resiko ng kopras mula 18-20 porsyento tungong 14-15 porsyento.

Samantala, naitaas naman ng mga magkukupra sa Camarines Sur ang presyo ng kopras nang sama-sama nilang hinarap ang malalaking kumprador sa prubinsya. Naigiit din ng mga paraha-got sa Catanduanes na itaas ang presyo ng bandala ng dalawang piso bawat kilo. Labis itong ikinagalak ng masang paraha-got dahil sa kasaysayan ay ngayon lamang nila naipahayag at naipagtagumpay ang malaon nang kinuyom na kahilingan. Kasabay nito, natuldukan din ang pandaraya ng mga timbangan sa mga kumprada nang manawagan sila para sa pagsasaayos ng mga timbangang may daya at maglagay ng mga timbangang bayan.

Tampok na pakikibaka din ang karanasan ng mga magsasaka sa Masbate. Nilabanan nila ang isa sa pinakamalaki at pinakamakapangyarihang asendero sa isla sa tangka nitong mangamkam ng lupa upang gawing pastuhan ng baka. Dahil sa sama-samang pagkilos at organisadong lakas, naka-

pusisyon ang mga magsasaka sa mahigit 700 ektarya at wala ni isa mang magsasakang napaalis.



Nagawa din ng mga pagkilos na mapataas ang pasahod sa mga manggagawang bukid. Sa Camarines Norte, tagumpay ang nakamit ng pagkakaisa ng mga maralita at mababang-panggitnang magsasaka upang itaas ang kanilang sahod sa pagtrabaho sa bukid. Nang sa simula'y tumanggi ang may-ari ng lupa, nagkaisa ang mga magsasaka sa pagboykot sa lupain at kinausap ang mamamayan ng karatig baryo upang suportahan ang kanilang pagkilos at tumanggi ring magtrabaho sa ibinoykot na bukid.

Ang dating hiwa-hiwalay na pagkilos ng mga magsasaka sa mga baryo, bayan, at prubinsya ay mapag-iisa sa antas rehiyon na mga pagkilos upang palawakin, pasiglahin, at isustine ang mga kampanyang tumutugon sa pinag-isang interes ng mga magsasaka. Sa hinaharap, ang mga pakikibakang masa ay hindi na lamang hiwa-hiwalay na pagkilos ng mga kulumpon ng mga magsasaka, kundi pagsulong na ng iisang uring kumikilos sa buong rehiyon. **S**

Rebyu ng Pelikula

Galak ang makikitang ekspresyon ng mga manunood nang unti-unting tumingkad ang armadong pakikibaka bilang mapagpasyang solusyon sa pangunahing problema ng masang magsasaka. Banggit ng isang Hukbo sa pelikula, habang sinusubukang suhulan ng PML, na hindi pwedeng iwanan ng Bagong Hukbong Bayan ang mga magsasaka kapag sila ay inaapi.



"*Buhay namin ito.*" Ito na siguro ang pinakamataas na pagkilalang sinambit tungkol sa pelikulang *Buhay Masbatenyoy*. Hindi iilan ang bumigkas ng mga katagang ito, matapos ang pagpapalabas ng pelikula, sa masang Masbatenyoy.

* Rebyu—ginagamit na termino bilang pakahulugan sa proseso ng panunuring masa sa likhang sining. **S**

Protestang Bayan ang Magpapatalsik sa Rehimen

Tulad ng ipinakita sa kasaysayan, nakasalalay sa malakas na kilusang masa at mga protestang bayan ang pagpapatalsik sa papet, korap, pasista at sobrang pahirap na rehimen ng US-Macapagal-Arroyo, pahayag ni Ka Greg Bañares, ang Tagapagsalita ng NDF-Bikol.

Aniya, ang mga pagkilos na nilalahukan ng malawak na nagkakaisang prente ng mamamayan, kasama ang iba pang mga grupong anti-GMA, mga relihiyoso, at militar ay maaaring lumundo sa pag-aalsang tipong-Edsa tulad ng naganap noong 1986 at 2001.

Sa pamamagitan ng mga protestang bayan na linalahukan ng malawak na mamamayan maitutulak ang malalaking negosyante, mga pulitiko, at maging ang imperyalismong US na iatras ang suporta sa rehimen ng-Arroyo hanggang sa maihiwalay ito at tuluyang mapatalsik sa Malakanyang.

Aniya, bunga ng napakatinding krisis sa kasalukuyan, lumilitaw ang kalagayan na maaaring samantalain ng mga heneral sa militar at ilang sibilyan upang marahas na agawin ang kapangyarihan sa rehimen.

Nilinaw din ng NDF na hindi solusyon ang kudeta sa mga saligang suliranin ng mamamayan. Ito ay isang marahas na paraan ng pag-aagawan sa kapangyarihan

ng iba't ibang paksyon ng naghaharing uri na may tuwirang basbas ang imperyalismong US. Tanging ang mga paksyon ng nagha-

haring uri na pina-boran ng imperyalismong US ang mailuluklok sa kapangyarihan.

Kung magtatagumpay ang pag-agaw ng kapangyarihang pampulitika sa pamamagitan ng kudeta at maitatag ang isang "revolutionary transition government", "civilian-military junta", o "military junta", malamang na pamunuan ito ng ilang heneral lamang. Kapag nakapag-konsolida ito, malaki ang posibilidad na ibaling nito ang panunupil sa rebolusyonaryong pwersa at mamamayan sa ilalim ng batas militar at pasistang diktadura, paliwanag ni Ka Greg.

Nanawagan kamakailan ang samahan ng mga retiradong heneral sa pamumuno ni dating Heneral Fortunato Abat na magbitiw na sa Malakanyang si Gloria Macapagal-Arroyo at itayo ang isang "revolutionary transition government". Sinasalamang ng pahayag na ito ang lalim at lawak ng diskuntento at demoralisasyon sa hanay ng militar at pulis. Dismayado sila sa kainutilan ng kanilang *Commander-in-Chief* na lutasin ang napakalubhang krisis sa lipunan, talamak na korapsyon at katiwalian sa burukrasyang sibil at militar.

Sa halip na maglunsad ng kudeta, hinihikayat ang mga upisyal at kawal ng AFP at PNP na lisanin ang rehimen ng US-Arroyo at suportahan ang pag-aalsang bayan na tipong-Edsa.

Kapalit ng pinatalsik na rehimen, maaaring buuin ang isang konseho ng mga patriyotiko at demokratikong pwersa at itayo ang isang gubyernong mas mahusay kaysa dati. Maaaring pagkaisahan sa bagong gubyerno ang pagpapatupad ng makabuluhang mga reporma at pagbabago sa lipunan, paglutas sa malubhang krisis, at pagtugon sa kahilingan ng iba't ibang sektor ng lipunan, panapos ni Ka Greg.

S



Uring Anakpawis

ni Ka Joel

Magbalikwas anakpawis! Ngayon na ang panahon
Tumindig ng buong tatag, sa digmaan ay sumuong
Ang maso ay ihambalos sa taksil at buhong
Magsasaka iwasiwas ang karet mo bilang tugon

Kapit bisig na magsikhay, mga kauri ay pukawin
Petiburges ay lumahok na, kanayunan ay tunguhin
Iyang takot ay iwaksi, ang paglaban ay pag-ibayuhin
Ipunin mo ang iyong lakas para sa dakilang layunin

Ang digmaang haharapin ay malupit, masalimuot
Balakid sa daraanan, paghandaang walang takot
Harapin buong giting, buhay man ay malagot
Alang-alang sa ating bayan, puksain lahat ng salot

Kalunsura'y papulahin ng protestang rumaragasa
Bumuhos sa kalsada, manggagawa't maralita
Kalampagin at usigin mga lider na masisiba
Hanggang silang mga buwitre'y mayanig sa mga sigwa

Sa kanayunan, digmang bayan ay pag-alabin
Hukbo ng mamamayan, ihanda ang hanay natin
Bawat buhong at pasista ay pagbayarin!
Ang detatsment, mga kampo ay lusubin!

Walang ibang magbabago at papanday ng lipunan
Na binansot at winasak ng imperyalista't gahaman
Tayo ngayon ang pupuksa sa lahat ng mangangamkam
Upang bayan ay lumaya at makamit ang tagumpay!



Malalaking Mobilisasyon Sa Araw ng Paggawa

Muling niyanig ng mga
padyak ng masang anak-
pawis ang mga lansangan ng
mga syudad at kabayanan
nitong nakaraang Mayo Uno
bilang paggunita sa Pan-
daigdigang Araw ng Paggawa.

Sa bawat kabisera ng mga
prubinsya, muling iginiit ng
masang Bikolano ang karag-
dagang P125 sa arawang sahod
ng mga manggagawa at P3,000
karagdagan sa buwanang
sweldo naman para sa mga
kawani ng gubyrerno. Sa
Camarines Norte, aabot sa 150
ang nakiisa sa kilos protesta,
at mahigit 3,000 naman ang
nagmartsa sa Camarines Sur.
Samantala, sa Albay ay 1,500
at 3,000 din ang sumabay sa
pagkilos. Maging sa mga isla ng
rehiyon ay dumagundong din
ang sigaw ng mamamayan.
Sampung libong mamamayang
Masbatenyo ang dumagsa sa
mga lansangan, at mahigit
isandaang Catandunganon
naman ang dumalo sa isang rali-
pagtitipon sa loob ng isang
bulwagan. Kaisa din ng mga
manggagawang Bikolano ang
mga magsasaka at iba pang
sektor sa lipunan sa
pagkundera sa mga kontra-
mamamayang patakarán at
hakbangin ng rehimeng
Macapagal-Arroyo.

S

Rebolusyonaryong Kanta

INTERNATIONALE

Intro: E7-Am-G-C G-D-G-D7

G C-Am
Bangon sa pagkakabusabos
D D7 G D7
Bangon mga bihag ng gutom
G C-Am
Katwiran ay bulkang sasabog
D D7 G
Buong lakas na dadagundong
D A D A F#m
Gapos ng kahapo'y lagutin tayong api ay magbalikwas
D G-Em D A7 D D7
Tayo ngayo'y inaalipin subalit atin ang bukas

Koro:
G C-Am D G
Ito'y huling paglalaban magkaisa nang masaklaw
G Em A D-D7
Ng internationale ang sangkatauhan
G C-Am D B
Ito'y huling paglalaban magkaisa nang masaklaw
E7 Am-G-C G D7 G
Ng internationale ang sangkatauhan

(chords tulad ng unang Stanza)
Wala tayong maaasahang
Bathala o manunubos
Kaya't ang ating kaligtasa'y
Nasa ating pagkilos

Manggagawa bawiin ang yaman
Kaisipa'y palayain
Ang maso ay ating tanganan
Kinabukasa'y pandayin

(ulitin ang Koro)
(Chords tulad ng unang Stanza)
Manggagawa at magsasaka
Ating Partido'y dakila
Palayasin natin ang mga gahaman
Sa anakpawis ang daigdigan

Wakasan pagsasamantala
Ng mga buwitre at uwak
Sa umagang sila'y maglaho
Mapulang araw sisikat
(Ulitin ang Koro)

Ito ang ipinapalaganap na bagong bersyon ng kantang
Internasyunale.

